

"ՎԱՎԵՐԱՅՆՈՒՄ ԵՄ"
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՆԱԽԱԳԱՀ Ռ. ՔՈՉԱՐՅԱՆ

"7" հունիսի 2005 թ.

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ
ՈՐՈՇՈՒՄ

12 մայիսի 2005 թվականի N 630-Ն

ՄՇԱԿՈՒԹԱՅԻՆ ԱՐԺԵՔՆԵՐԻ ԱՐՎԵՍՏԱՔԱՆԱԿԱՆ ԵՎ ՄՇԱԿՈՒԹԱՔԱՆԱԿԱՆ
ՓՈՐՁԱՔՆՆՈՒԹՅԱՆ ԱՆՑԿԱՑՄԱՆ ԿԱՐԳԸ ԵՎ ՉԱՓՈՐՈՇԻՉՆԵՐԸ ՀԱՍՏԱՏԵԼՈՒ
ՍԱՍԻՆ

"Մշակութային արժեքների արտահանման եւ ներմուծման մասին" Հայաստանի Հանրապետության օրենքի 7-րդ հոդվածի 1-ին մասի 4-րդ կետին համապատասխան՝ Հայաստանի Հանրապետության կառավարությունը որոշում է.

1. Հաստատել մշակութային արժեքների արվեստաբանական եւ մշակութաբանական փորձաքննության անցկացման կարգը եւ չափորոշիչները՝ համաձայն հավելվածի:

2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

ՍՏՈՐԱԳՐՎԵԼ Է ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏԻ ԿՈՂՄԻՅ
2005 ԹՎԱԿԱՆԻ ՄԱՅԻՍԻ 30-ԻՆ

Հավելված
ՀՀ կառավարության
2005 թվականի մայիսի 12-ի
N 630-Ն որոշման

ՄՇԱԿՈՒԹԱՅԻՆ ԱՐԺԵՔՆԵՐԻ ԱՐՎԵՍՏԱՔԱՆԱԿԱՆ ԵՎ ՄՇԱԿՈՒԹԱՔԱՆԱԿԱՆ
ՓՈՐՁԱՔՆՆՈՒԹՅԱՆ ԱՆՑԿԱՑՄԱՆ ԿԱՐԳԸ ԵՎ ՉԱՓՈՐՈՇԻՉՆԵՐԸ

I. ԸՆԳՀԱՆՈՒՐ ԴՐՈՒՅԹՆԵՐ

1. Սույն կարգով եւ չափորոշիչներով սահմանվում են մշակութային արժեքների (այսուհետ՝ արժեք) արվեստաբանական եւ մշակութաբանական փորձաքննության (այսուհետ՝ փորձաքննություն) անցկացման կարգը եւ չափորոշիչները:

2. Փորձաքննությունն իրականացնում են համապատասխան լիցենզիա ունեցող իրավաբանական կամ ֆիզիկական անձինք՝ սույն կարգով եւ չափորոշիչներով նախատեսված արժեքների փորձաքննության տեսակներին ու չափորոշիչներին համապատասխան:

II. ԱՐԺԵՔՆԵՐԻ ՓՈՐՁԱՔՆՆՈՒԹՅԱՆ ՏԵՍԱԿՆԵՐԸ

3. Փորձաքննությունն իրականացվում է երկու՝ պարզ փորձաքննության եւ համալիր փորձաքննության եղանակով:

4. Պարզ փորձաքննությունն արժեքի տեսողական (վիզուալ) ու մասնագիտական գրականության եւ այլ աղբյուրների ուսումնասիրման եղանակով իրականացվող փորձաքննությունն է:

5. Համալիր փորձաքննությունն արժեքի պարզ փորձաքննությամբ եւ տեխնոլոգիական՝ ֆիզիկաքիմիական ու կենսաբանական եղանակով՝ տեխնիկական միջոցներով իրականացվող փորձաքննությունն է: Համալիր փորձաքննությունն իրականացվում է պարզելու համար՝

ա) հեղինակային ստորագրությունն ու նշումները, դրոշմներն ու կնիքները,

բ) կեղծման, վերականգնման հետքերն ու նշանները,

գ) ստեղծման վայրի, ժամանակի, հումքի, պատրաստման տեխնոլոգիայի մասին տվյալները:

III. ԱՐԺԵՔՆԵՐԻ ՓՈՐՉԱՔՆՆՈՒԹՅԱՆ ՉԱՓՈՐՈՇԻՉՆԵՐԸ

6. Արժեքների փորձաքննության չափորոշիչներն են՝
- ա) անվանումը, վերնագիրը,
 - բ) հեղինակը,
 - գ) վարպետը, արտադրողը, հրատարակիչը,
 - դ) տիպը, ուղղությունը, դպրոցը,
 - ե) ստեղծման ժամանակը,
 - զ) ստեղծման վայրը,
 - է) իսկությունը (բնօրինակ կամ կեղծ լինելը),
 - ը) նյութը,
 - թ) ֆիզիկական չափսերը (երկարություն, լայնություն, բարձրություն, տրամագիծ, քաշ), հարգը,
 - ժ) արժեքի էթնիկական պատկանելությունը, ստեղծողի էթնիկ պատկանելությունը,
 - ժա) տեխնիկական-տեխնոլոգիական բնութագիրը (ֆիզիկաքիմիական, կենսաբանական փորձաքննության արդյունքները),
 - ժբ) պատրաստման տեխնիկան,
 - ժգ) հեղինակի ստորագրությունը,
 - ժդ) դրոշմը, կնիքը, արձանագրության հատուկ նշանները,
 - ժե) առարկային պահպանվածությունը (ամբողջական, մասնակի, վերականգնված՝ մանրամասն նկարագրությամբ),
 - ժզ) առարկայի գինը,
 - ժէ) առարկայի մշակութային նշանակությունն ու կարեւորությունը:

IV. ՓՈՐՉԱՔՆՆՈՒԹՅԱՆ ԻՐԱԿԱՆԱՑՈՒՄԸ

7. Արժեքի սեփականատերը կամ նրա կողմից լիազորված անձը (այսուհետ՝ պատվիրատու) արժեքի մասին փորձագիտական եզրակացություն ստանալու համար գրավոր դիմում է փորձաքննություն իրականացնող իրավաբանական կամ ֆիզիկական անձին:

8. Դիմումում նշվում են՝

ա) պատվիրատուի անվանումը եւ գտնվելու վայրը (ֆիզիկական անձանց համար՝ անունը, ազգանունը, բնակության վայրի հասցեն, հեռախոսահամարը, անձնագրի սերիան եւ համարը),

բ) առարկային անվանումը, քանակը, փորձաքննության նպատակը՝ առարկայի իսկության պարզում, առարկայի արժեքն ըստ պատվիրատուի, հայտարարություն սեփականության մասին:

9. Դիմումին կից ներկայացվում են արժեքի 9 x 12 չափսի 2 գունավոր լուսանկար, ինչպես նաեւ արժեքին վերաբերող այլ տեղեկություններ եւ փաստաթղթեր (առկայության դեպքում), որոնք կօգնեն փորձաքննությանը:

10. Արժեքը պատվիրատուից ընդունվում է ժամանակավոր պահպանության, եւ տրվում է ստացական, որի ձեւանմուշը հաստատում է լիազորված պետական մարմինը:

Ստացականը լրացվում է 2 օրինակից, որի մեկ օրինակը մնում է փորձաքննություն իրականացնողի մոտ:

11. Դիմումը գրանցվում է դիմումների գրանցամատյանում, որի էջերը համարակալված, կարված են եւ կնքված են լիազորված պետական մարմնի կնիքով:

12. Դիմումների գրանցամատյանը համարվում է հիմնական հաշվառման փաստաթուղթ: Գրանցամատյանում գրանցման համարների հերթականությունը վերսկսվում է յուրաքանչյուր տարվա հունվարի 1-ից:

13. Դիմումի գրանցման համարը տվյալ պատվիրատուի գործի ծածկագիրն է՝ գրանցման թվի, օրվա, ամսվա եւ տարեթվի հաջորդականությունը պարունակող նիշերով:

14. Գործը կազմվում է պատվիրատուի դիմումից, փորձագիտական եզրակացության պատճենից, արժեքի լուսանկարից եւ այլ փաստաթղթերից:

15. Գործը պահվում է անժամկետ: Փորձաքննություն իրականացնող լիցենզավորված անձը պատասխանատու է պատվիրատուի մասին տվյալների գաղտնիության համար:

16. Փորձաքննության տեսակն ընտրվում է արժեքի նախնական գնման արդյունքում՝ ոչ ուշ, քան 2 օրվա ընթացքում: Փորձաքննության ընթացքում, կողմերի համաձայնությամբ, փորձաքննության տեսակը կարող է փոխվել:

17. Փորձաքննություն իրականացնող անձի եւ պատվիրատուի միջեւ կնքվում է ծառայությունների մատուցման պայմանագիր՝ Հայաստանի Հանրապետության քաղաքացիական օրենսգրքով սահմանված կարգով:

18. Փորձաքննության սկիզբ է համարվում ստացականը տալու օրը, իսկ փորձաքննության ավարտ՝ պատվիրատուին փորձագիտական եզրակացությունը հանձնելու օրը:

Փորձաքննության առավելագույն ժամկետ է սահմանվում 15 օրը՝ բացառությամբ այն դեպքերի, երբ, կողմերի համաձայնությամբ, այն երկարաձգվում է որոշակի ժամկետով:

19. Փորձաքննության վճարի չափը եւ փորձաքննության անցկացման ժամկետի խախտման համար կողմերի փոխադարձ պատասխանատվությունը սահմանվում են պայմանագրով:

20. Փորձաքննություն իրականացնող անձն արժեքի ընդունման պահին ունեցած վիճակի փոփոխման համար պատասխանատվություն է կրում օրենքով սահմանված կարգով:

21. Առանց սեփականատիրոջ գրավոր համաձայնության փորձաքննության ներկայացված արժեքը չի կարող օգտագործվել գիտական ուսումնասիրման համար, կամ չի կարող հրատարակվել դրա մասին տեղեկատվություն:

22. Փորձագետը պատասխանատու է փորձագիտական եզրակացության արժանահավատության եւ օբյեկտիվության համար: Փորձագետը կեղծ փորձագիտական եզրակացություն տալու համար կրում է պատասխանատվություն՝ օրենքով սահմանված կարգով:

23. Եթե փորձաքննության արդյունքում բացահայտվում է, որ արժեքը գողացված է կամ գտնվում է հետախուզման մեջ, փորձաքննություն իրականացնող անձը դրա մասին տեղյակ է պահում իրավապահ մարմիններին:

V. ՓՈՐՉԱԳԻՏԱԿԱՆ ԵԶՐԱԿԱՑՈՒԹՅՈՒՆԸ

24. Փորձաքննության տեսակին եւ փորձաքննության չափորոշիչներին համապատասխան իրականացված փորձաքննության արդյունքում պատվիրատուին տրվում է փորձագիտական եզրակացություն:

25. Փորձագիտական եզրակացությունը լրացվում է հայերեն՝ տպագիր, եւ ներառում է՝
ա) փորձագիտական եզրակացությունը (հնգանիշ համար),
բ) փորձաքննությունն իրականացրած իրավաբանական կամ ֆիզիկական անձի լրիվ անվանումը,

գ) արժեքի անվանումը,
դ) արժեքի գիտական նկարագրությունը,
ե) արժեքի ստեղծման տարեթիվը (թվագրումը), հրատարակման տարեթիվը,
զ) արժեքի ստեղծման վայրը՝ երկիրը, հրատարակության վայրը, հրատարակչությունը,
է) արժեքի նյութը,

ը) արժեքի ֆիզիկական չափսերը (երկարություն, լայնություն, բարձրություն, տրամագիծ), քաշը, հարգը, էջերի թիվը, տպաքանակը եւ այլն,

թ) արժեքի պահպանվածությունը (ամբողջական, մասնակի, վերականգնված՝ մանրամասն նկարագրությամբ),

ժ) արժեքի պատրաստման տեխնիկան, տեխնիկական-տեխնոլոգիական բնութագիրը (ֆիզիկաքիմիական, կենսաբանական փորձաքննության արդյունքները),

ժա) հեղինակը (ստեղծողը),

ժբ) արձանագրության, ստորագրության, դրոշմի, կնիքի վերծանությունը, հատուկ նշաններ,

ժգ) ժողովուրդը, էթնիկական խումբը, դպրոցը,

ժդ) արժեքի՝ իր տեսակի կամ տիպի մեջ առանձնահատուկ լինելը,

ժե) արժեքի՝ պատմական, հնագիտական, ազգագրական, գեղարվեստական, կրոնական, մշակութաբանական, արվեստաբանական կամ գիտական հատուկ հետաքրքրություն ներկայացնելը,

ժզ) արժեքի՝ պատմամշակութային զարգացման վկայագիր-վավերագրի նշանակություն ունենալը,

ժէ) արժեքի՝ ազգային պատմամշակութային ժառանգության համար կարեւոր նշանակություն ունենալը,

ժը) համաշխարհային մշակութային ժառանգության համար հետաքրքրություն ներկայացնելը,

ժթ) զինը (Հայաստանի Հանրապետության արժույթով)։

ի) փորձաքննություն իրականացնող անձի կնիքը եւ ստորագրությունը (իրավաբանական անձի դեպքում՝ նաեւ փորձագետի ստորագրությունը),

իա) տալու ամսաթիվը, ամիսը, տարեթիվը:

26. Սույն բաժնի 25-րդ կետի "ժդ", "ժե", "ժզ", "ժէ" եւ "ժը" ենթակետերի պատասխանները փորձագիտական եզրակացության մեջ արտացոլվում են, եթե ներկայացված առարկան մշակութային արժեք է եւ համապատասխանում է նշված ենթակետերից որեւէ մեկի պահանջին:

27. Փորձագիտական եզրակացությունը վավերական է արժեքի լուսանկարի առկայությամբ, որի շրջերեսին փորձաքննություն իրականացնող անձը լրացնում է արժեքի հիմնական չափորոշիչները (անվանումը, հեղինակը, ստեղծման տեղը, ժամանակը, չափսերը):

UNESCO Cultural Heritage Laws Database
(Copyright and Disclaimer apply)